

弘明集卷第四

四十

梁釋僧祐述

何承天達性論

顏光祿延之難

夫兩儀既住帝王參之宇中莫尊焉天以陰

于十

陽分地以剛柔用人以仁義立人非天地不

生天地非人不靈三才同體相須而成者也

故能稟氣清和神明特達情綜古今智周萬物妙思窮幽贊制作侔造化歸仁與能是爲

君長撫養黎元助天宣德日月淑清四靈來

格祥風協律王燭揚暉九穀芻黍陸產水育

酸鹹百品備其膳羞棟宇舟車銷金合土絲綺玄黃供其器服文以禮度娛以八音庇物殖生罔不備設夫民用儉則易足易足則力

有餘力有餘則志情泰樂治之心於是生焉

顏延之釋何衡陽達性論

事簡則不擾不擾則神明靈神明靈則謀慮  
乾坤以易簡示人所以訓示懃懃若此之篤  
也安得與夫飛沈蠅蠕並爲衆生哉若夫衆  
生者取之有時用之有道行火俟風暴畋漁

候豺獺所以順天時也大夫不麌卵庶人不  
數罟行葦作歌霄魚垂化所以愛人用也庖  
厨不邇五犯是翼殷后改祝孔鈞不綱所以  
明仁道也至於生必有死形斃神散猶春榮  
秋落四時代換奚有於更受形哉詩云愷悌

君子求福不回言弘道之在己也三后在天

言精靈芝升遐也若乃內懷嗜欲外憚權教  
慮深方生施而望報在昔先師未之或言余

前得所論深見弘慮崇致人道黜遠生類物  
有明微事不愆義維情輔教足使異門掃軌  
況在斬同豈忘所附徒恐琴瑟專一更失闡  
諧故略廣數條取盡後報足下云同體二儀  
共成三才者是必合德之稱非遭人之自然  
十一

總庶類同號衆生亦含識之名豈上括之謐  
然則議三才者無取於氓隸言衆生者亦何  
濫於聖智雖情在序別自不患亂倫若能兩  
籍方教俱舉達義節彼離文採此共實則可  
便倍害自和析符復合何詎快快執呂以毀  
律且大德曰生有萬之所同同於所方萬豈  
得生之可異不異之生宜其爲衆但衆品之  
中愚慧羣差人則役物以爲養物則見役以  
養人雖始或因順終至裁殘庶端萌起情嗜  
不禁生害繁慘天理鬱滅皇聖哀其若此而

不能頓奪所滯故設候物之教謹順時之經  
將以開仁育識反漸息心泰耳與道爲心者或  
不劑此而止又知大制生死同之榮落類諸  
區有誠亦宜然神理存沒儻異於枯荄變  
謝就同草木便當煙盡而復云三后升遐精

靈在天若精靈必在果異於草木則受形之  
論無乃更資來說將由三后粹善報在生天  
耶欲毀後生反之立升遐當毀更立固知非力  
所除若徒有精靈尚無體狀未知在天當何  
憑以立吾怯於庭斷故務求依倣而進退思  
十一

索未獲所安凡氣數之內無不感對施報之  
道必然之符言其必符何猜有望故遺惠者  
無要在功者有期期存未善去惠乃至人有  
賢否則意有公私不可見物或期報因謂樹  
德皆要且經世恒談貴施者勿憶士子服義

猶惠而弗有況在聞道要更不得虛心而動  
必懷嗜事盡憚權耶曾不能引之上濟每驅  
之下淪雖深誚狡責亦已厚言不代足下嬰  
城素堅難爲飛書而吾自居憂患情理無託  
近辱襄告欲其布意裁往釋慮不或值顏延  
之白

何衡陽答顏永嘉

敬覽芳訊研復淵旨區別三才步驗精粹宣  
演道心襄賞施士貫綜幽明推誠及物行之  
於己則美敷之於教則弘殆無所聞退尋嘉  
誨之來將欲令參觀斗極復迷反逕思或昧  
然未全曉洽故復重伸本懷足下所謂共成  
三才者是必合德之稱上哲之人亦何爲其  
然夫立人之道取諸仁義惻隱爲仁者之表  
恥惡爲義心之端牛山之木剪性於鑿斧恬

漠之想汨慮於利害誠宜滋其萌蘖援其善  
心遂乃存而不算得無過與又云議三才者  
無取於氓隸言衆生者亦何濫於聖智既已  
聞命猶未知二塗當以何爲判將伊顏下麗  
寧喬札上附企望不倦以祛未了必令兩籍  
俱舉官和符合豈不盡善又曰大德曰生有  
萬之所同同於所方萬豈得生之可異非謂  
不然人生雖均被大德不可謂之衆生譬聖  
人雖同稟五常不可謂之衆人奚取於不異  
之生必宜爲衆哉來告云人則役物以爲養  
物則見役以養人大判如此便是顧同鄙議

七十  
四  
至於情嗜不禁害生慘物所謂甚者泰者聖  
人固已去之又云以道爲心者或不劑此而  
止請問不止者將自己不殺耶令受教咸同  
耶若自己不殺取足市鄴故是遠庖廚意必

欲推之於編戶吾見雅論之不可立矣又云

若同草木便當煙盡精靈在天將何憑以立

夫神魄惚恍遊魂爲變發揚悽愴亦于何不  
之仲由屈於知死賜也失於所問不更受形  
前論之所明言所憑之方請附夫子之對及

施報之道必然之符當謂于氏高門俟積善  
之慶博陽不伐膺公侯之祚何關於後身乎  
又云經世恒談施者勿憶士子服義惠而弗  
有誠哉斯言微恨設報以要惠說徒之所先  
悅報而爲惠舉世之常務疑經受累劫之罪

勤施獲積倍之報不似吾黨之爲道者是以  
快快耳知欲引之上濟亦甚所不惜但丈夫  
處實者頗陋前識之華故不爲也若乃施非  
周急惠存功譽揆諸高明亦有恥乎此吾率  
其恒心久而不化內慚璩子未暇有所謂也

何承天白  
顏永嘉重釋

何衡陽薄從歲事躬斂山田田家節隙野老  
爲儔言止穀稼務盡耕牧談年計耦無聞達  
義重獲微辭得用昭慰啓告精至愈慚固結

今復忘書往懷以輸未述夫藉意探理不若  
析之聖文三才之論故當本諸三畫三畫既  
陳中稱君德所以神致太上崇一元首故前  
謂自非體合天地無以元應斯弘知研其清  
慮未肯存同猶以兼容罔棄廣載不遺篤物  
之志誠爲優贍恐理位雜越疑陽遂衆若惻  
隱所發窮博愛之量恥惡所加盡祐直之正  
則上仁上義吾無間然但情之者寡利之者  
衆預有其分而未臻其極者不得以配擬二  
儀耳今方使極者爲師不極者爲資扶其敬

讓去其忮爭令鋟斧鑄刃利害寢端驅百代之民出信厚之塗則何萌不滋何善不援而誣以不筭未值其意三才等列不得取偏才之器衆生爲號不可濫無生之人故此去悞隸彼甄聖智兩藉俱舉旨在於斯若喬札未能道一皇王豈獲上附伊顏猶共賴氣化宜乎下麗二塗之判易於曠指又知以人生雖均被大德不可謂之衆生譬聖人雖同稟五常不可謂之衆人夫不可謂之衆人以茂人者神明也今已均被同衆復何諱衆同故當殊其特靈不應異其得生徒忌衆名未虧衆實得無似蜀梁逃畏卒不能避所謂役物爲養見役養人者欲言愚慧相傾憎相制事由智出作非出天理是以始矜萌起終哀篤滅豈與足下芻豢百品共其指歸凡動而蓋

十一

六

流下民之性化而裁之上聖之功謹爲垣防猶患踰盜況乃罔不備設以充侈志方開所泰何議去甚故知慘物之談不得與薄夫同憂樂殺意偏好生情博所云與道爲心者博乎生情將使排虛率遂跖實莫及利澤通天而不爲惠庸適恩止虧卯事法豺獺耶推此往也非唯自己不復委咎市鄼乎庖厨且市庖之外非無御養神農所書中散所述公理美其事仲彥精其業是亦古有其傳今聞其人何必以剗剗爲稟和之性爛淪爲翼善之具哉若以編戶難齊憂鄙論未立是見二叔不咸慮周德先亡儻能伸以遠圖要之長世則日計可滿歲功可期精靈草木果已區別遊蒐之答亦精靈之說若雖有無形天下寧有無形之有顧此惟疑宜見正定仲尼不答

有無未辯足下旣辯其有豈得同不辯之答雖子嘗學懼未獲所附或是曉晦塗隔隱著事懸遂令明月廢照世智限心知謂必符之言體之極于罔講求反意如非相盡或世人守璞受讓玉市將譯胥牽俗還說國情苟未

照盡請復具伸近釋報施首稱氣數者以爲

物無妄然各以類感感類之中人心爲大心術之動隸歷所不能得及其積致于可勝原而當斷取世見據爲高證莊周云莽鹵滅裂報亦如之孫卿曰報應之勢各以類至後身著戒可不敬與慈護之人深見此數故正言其本非邀其末長美遏惡反民大順濟有生之類入無死之地令慶周兆物尊冠百神安宜祚極子胤福限卿相而已常善以救善亦從之勢猶影表不慮自來何言乎要惠悅報

疑罪勤施似由近驗吝情遠猜德教方罰矜功而濫咎志賢遺存異義公私殊意已備前白若不重云想處實陋華者復見其居厚去薄耳若施非周急惠而期譽乃如之人誠道之蠹惟子之恥丘亦恥之

何衡陽重答顏永嘉

吾少信管見老而彌篤旣言之難云將湮腐方寸故願憑流颺以託鱗融厚故意垂懷惠以重釋稽證周明華辭博贍夫良玉時玷賤夫指其瑕望舒抱魄野人睨其缺豈伊好辯未獲云已復進請益之間庶以研盡所滯來告云三才之論故當本諸三畫三畫旣陳中稱君德所以神致太上崇一元首若如論旨以三畫爲三才則初擬地爻三議天位然而遜世無悶非厚載之目君子乾乾非蒼蒼之

稱果兩儀罔託亦何取於立人但父在中和宜應蓄德耳又云惻隱窮博愛之量恥惡盡枯直之方則爲上仁上義便是計體仁義者爲三才尋又云喬札未獲上附伊顏宜其下麗則黃裳之人其猶弗及雖贖之旨高下無

<sup>十七</sup>

<sup>八</sup>

准故惑者未悟也夫陰陽陶氣剛柔賦性圓首方足容貌匪殊惻隱恥惡悠悠皆是但參體二儀必舉仁義爲端取知欲限以名器慎其所假遂令惠人潔士比性於毛羣庶幾之賢同氣於介族立象之意豈其然哉又云已均被同衆復何譁衆同故當殊其特靈不應異其得生夫特靈之神既異於衆得生之理何嘗暫同生本於理而理異焉同衆之生名將安附若執此生名必使從衆則混成之物亦將在例耶又云謹爲垣防猶患踰盜況乃

罔不設備以克侈志方開所泰何議去甚足下始云皇聖設候物之教謹順時之經將以反漸息泰今復以方開所泰爲難未詳此將難鄙議將譏聖人也又云市庖之外豈無御養神農所書中散所述何必以剗剗爲栗和爛淪爲翼善夫禋粢蘭栗宗社三牲臍肺豆俎以供賓客七十之老俟肉而飽豈得唯陳列草石取備上藥而已吾所憂不立者非謂洪論難持退嫌此事不可頓去於世耳又云天下寧有無形之有顧此惟疑宜見正定尋

<sup>十</sup>

<sup>九</sup>

來旨似不嫌有鬼當謂鬼宜有質得無惑天竺之書說鬼別爲生類故耶昔人以鬼神爲教乃列于典經布在方策鄭喬吳札亦以爲然是以雲和六變寶降天神龍門九成人鬼咸格足下雅秉周禮近忽此義方詰無形之

有爲支離之辯乎又云後身著戒可不敬與慈護之人深見此數未詳所謂慈護者誰氏之于若據外書報應之說皆吾所謂權教者耳凡講求至理曾不折以聖言多採譎怪以相扶翼得無似以水濟水耶又云物無妄然必以類感常善以救善亦從之勢猶影表不慮自來斯言果然則類感之物輕重必侔影表之勢脩短有度致飾土木不發慈愍之心順時蒐狩未根慘虐之性天官華樂焉賞而上升地獄幽苦奚罰而淪陷唱言窮軒輕立法無衡石一至於此且阿保傳愛慎及溷腴良庖提刀情怵介族彼聖人者明並日月化開三統若令報應必符亦何妨於教而緘局羲唐之紀埋閉周孔之世肇結網罟興累億之罪仍制牲牢開長夜之罰遺彼天廚甘比

芻豢曾無拯溺之仁橫成納隍之酷其爲不然宜簡淵慮若謂窮神之智猶有所不盡雖高情愛竒想亦未至於侮聖也足下論仁義則云情之者少利之者多言施惠則許其遺賢忘報在情旣少孰能遺賢利之者多曷云忘報若能推樂施之士以期欲仁之疇演忘報之意引向義之心則義寔在斯求仁不遠至於濟有生之類入無死之地慶周兆物尊冠百神斯旨宏誕非本論所及無乃秦師將遁行人言肆乎豈其相迫居吾語子聖人在上不與百神爭長有始有卒焉得無死之地夫辯章幽明研精庶物反初結繩終繁文教性以道率故絕親譽之名範圍造化無傷博愛之量以畋以漁養兼賢鄙三品之獲實充賓庖金石發華笙籥協節醉酒飽德介茲萬

年處者弘日新之業仕者敷先王之教誠著  
明君澤被萬物龍章表觀鳴玉節趨斯亦堯  
孔之樂地也及其不遇考槃阿澗以善其身  
殺雞爲黍聊寄懷抱或負鼎割烹揚隆名於  
長世或屠羊鼓力陵高志於浮雲此又君子

之處心也何必陋積善之延祚希無驗於來  
世生背當年之真懼徒疲役而靡歸轍風捕  
影非中庸之美慕夷眩妖違通人之致蹲膜  
揖讓終不並立竊願吾子捨兼而遵一也及  
蜀梁二叔甘人驛胥之譬非本義所繼故不  
復見云

顏永嘉又釋何衡陽

聖慮難原神應不測中散所云中人自竭莫  
得其端豈其淺斥所可深抽徒以魏文大布  
見刊異世勝修蝦鬚取愧當時故於度外之

事性以意裁耳足下已審其虛實方書之不  
朽獨鑒堅精難復疑問聊寫餘懷依答條釋  
事緯殃福義雜胡華雖存簡章自至煩  
此已往余欲無言

答曰若如論旨以三畫爲三才則初擬地爻  
三議天位然而遯世無悶非厚載之目君子  
乾乾非蒼蒼之稱果兩儀罔託亦何取於立  
人但爻在中和宜應君德耳

釋曰聞之前學淳象始於三畫兼卦終於六  
爻三畫立本三才之位六爻未變羣龍所經  
是以重卦之後則以出處明之故遯世乾乾  
潛藏皆行聖人適時之義兼之道也若以初  
爻非地三位非天以爲兩儀罔託立人無取  
未知足下前論三才同體何因而生若猶受  
之繫說不軼師訓何獨得之複卦喪之單象

如義文之外更有三才此自春秋新意吾無識焉且遜世乾乾雖非覆載之名一體之中未失卑高之實豈得以變動之辭廢立本之義又知以爻在中和宜應君德若徒有中和之爻竟無中和之人則爻將何放若中和在德則不得人皆中和體合之論固未可殊越答曰上仁上義便是許體仁義者為三才尋又云喬札未獲上附伊顏宜其下麗則黃裳之人其猶弗及雖贖之旨高下無准故惑者未悟

方准墨伊顏未獲法身故當下麗生品來論挾姬議釋故兩解比意冀以取了反致辭費聖作君師賢為臣資接暢神功影響大業行藏可共默語亦同體分至此何負黃裳議者徒見不得等位元首橫生誚恨而不知引之極地更非守節之情指斷如斯何謂無准

答曰夫陰陽陶氣剛柔賦性圓首方足容貌匪殊惻隱恥惡悠悠皆是但參體二儀必舉仁義為端耳

釋曰若謂圓首方足必同恥惻隱之實容貌

釋曰所云上仁上義謂兼總仁義之極可以對饗天地者耳非謂少有恥愛便為三才前釋已具怪復是問四彼域中唯王是體知三此兩儀非聖不居易者同歸可無重惑案東魯階差喬札理不允備何由上附至位依西

不善人多其分若此何謂皆是

答曰知欲限以名器慎其所假遂令惠人潔士比性於毛羣庶幾之賢同氣於介族立象之意豈其然乎

釋曰名器有限良由資體不備雖欲假之疑

千十

十三

陽謂何含靈爲人毛羣所不能同稟氣成生潔士有不得異象放其靈非象其生一之而已無乃誣漫

答曰已均被同衆云云特靈之神既異於衆

得生之理何嘗鑿同生本於理而理異焉同衆之生名將安附若執此生名必使從衆則混成之物亦將在例耶

釋曰吾前謂同於所方豈得生之可異足下答云非謂不然又曰奚取不異之生必宜爲衆是則去吾爲衆而取吾不異豈有不異而

非衆哉所以復云故當殊其特靈不應異其

得生耳今答又謂得生之理何嘗鑿同生本於理而理異焉請問得生之理故是陰陽耶吾不見其異而是下謂未嘗鑿同若有異理

非復煦蒸耶則陰陽之表更有受生塗趣三

世詎宜堅立使混成之生與物同氣豈混成之謂若徒假生名莫見生實則非向言之匹言生非生即是有物不物李叟此說或更有其義以無詰有頗爲未類

答曰謹爲垣防云云始云皇聖設候物之教謹順時之經將以反漸息泰今復以方開所泰爲難未詳此將難鄙議爲譏聖人也

釋曰前觀本論自九穀以下至孔鈞不綱始知高議謂凡有宰作皆出聖人躬爲尸匠以率先下民也孤鄙拙意自謂每所施爲動必

有因聖人從爲之節使不遷越此二懷之大  
斷彼我所不同吾將節其奢流故有息泰之  
說是下方明備設未知於何去甚而中答又  
云所謂甚者聖人固已去之不了此意故近  
復以所泰爲問答云未詳誰難或自己前報

<sup>十一</sup>

<sup>十四</sup>

答曰市庖之外云云夫禋瘞繩粟宗社三牲  
臠腳豆俎以供賓客七十之老俟肉而飽豈  
得唯陳草石取備上藥而已而憂不立者非  
謂洪論難持退嫌此事不可頓去於世耳  
釋曰神農定生周人備教既唱粒食又言上

藥既用犧牢又稱蘋蘩祭膳之道故無定方  
前舉市庖之外復有御養者捐奪剗淪之滯  
以明延性不一非謂經世之事皆當取備草  
石然芻豢之功希至百齡芝术之懿亟聞千  
歲由是言之七十之老何必謝恩於肉食但

自封一域者捨此無術耳想不可頓去於世  
猶是前釋所云不能頓奪所滯也始獲符同  
敢不歸美既知不可頓去或不謂道盡於此  
答曰天下寧有無形之有云云尋來旨似不  
嫌有鬼當謂鬼宜有質得無惑天竺之書說

鬼別爲生類耶昔人以鬼神爲教乃列于典  
經布在方策鄭喬吳札亦以爲然是以雲和  
六變寶降天神龍門九成人鬼咸格足下雅  
秉周禮近忽此義方詰無形之有爲支離之  
辯乎

<sup>十一</sup>

<sup>十五</sup>

釋曰非唯不嫌有鬼乃謂有必有形足下不  
無是同處有復異是以比及質詰欲以求盡  
請捨天竺之說謹依中土之經又置別爲生  
類共議登遐精靈體狀有無固然宜報定典  
策之中鬼神累萬所不了者非其名號比獲

三論每來益衆萬鬼畢至竟未片答雖啓告周博非解企渴無形之有既不匠立徒謂支離以爲通說若以覈正爲支離者將以浮漫爲直達乎

答曰後身著戒云云未詳所謂慈護者誰氏之子若據外書報應之說皆吾所謂權教者耳凡講求至理曾不析之聖言多採譎怪以相扶翼得無似以水濟水乎

釋曰慈護之主計亦久聞其人責以誰子將以文殊釋氏和謂報應之說皆是權教權道隱深非聖不盡雖子通識慮亦未見其極吾疲於推求而足下逸於獨了良有惡然若權教所言皆爲欺妄則自然之中無復報應吾懦於擊決足下烈於專斷亦又懼焉神高聽卑庸可誣哉想云聖言者必姬孔之詰今之

所談皆其信順之事而謂曾不析之復是未經詳思來論立姬廢釋故吾引釋符姬答不越問未覺多採由金日磾不生華壤何限九服之外不有窮理之人內外爲判誠亦難乎若自信其度獨師耳目習識之表皆爲譎怪則吾亦已矣

答曰又云物無妄然必以類感云云斯言果然則類感之物輕重必侔影表之勢脩短有度致飾土木不發慈愍之心順時蒐狩未根慘虐之性天宮華樂焉賞而上升地獄幽苦奚罰而淪陷唱言窮軒輕立法無衡石一至於此

釋曰影表之說以微感報來意疑不必侔嫌其無度即復除福應也福應非他氣數所生若滅福應即無氣數矣足下功存步驗而還

伐所知想信道爲心者必不至此若謂不慈於土木之飾有甚於順時之殺者無乃大負夫人之心黃屋玉璽非必堯舜之情崇居麗養豈是釋迦之意責天官之賞求地獄之罰頗類昔人亞夫之詰英布之間有味乎其言此蓋衆息心之所詳吾可得而略之

答曰且阿保傳愛慎及溷腴良庖提刀情慄介族彼聖人者明並日月化闢三統若令報應必符亦何妨於教而緘局羲唐之紀埋閭周孔之世肇結網罟興累億之罪仍制牲牢開長夜之罰遺彼天厨甘此芻豢曾無拯溺之仁橫成納隍之酷其爲不然宜間淵慮若謂窮神之智猶有所不盡雖高情愛奇想亦未至於侮聖

釋曰知謂報應之義緘羲周之世以此推求

十七

十七

爲不符之證羲唐邈矣人莫之詳尚書所載不過數篇方言德刑之美遑記禍福之源今帝典王策猶不書性命之事而微闕文以爲古必無之斯亦師心之過也且信順殃慶咸列姬孔之籍謂之埋閭如小逕并但言有遠近教有淺深故使智者與此而奪彼耶夫生必有欲欲必有求欲歛則爭求給則恬爭則相害恬則相安網罟之設將蠲害以取安乎且畋漁牲牢其事不異足下前答已知牲牢不可頓去於今世復謂畋漁不可獨棄於古未爲通類矣好生惡死每下愈篤故宥其死者順其情奪其生者逆其性至人尚矣何爲犯順而居逆哉是知不能頓奪所滯故因爲之制耳聖靈雖茂無以顧懷惜之心弱喪之民何可勝論罪罰之來將物自取之事遠難

致不由天廚見遺物近易耽故常芻豢是甘

拯溺出隍衆哲所共但化物不同非道之異  
不盡之讓亦如過當子長愛奇本不類此

答曰足下論仁義則云情之者少利之者多  
言施惠則許其遺賢忘報在情既少孰能遺  
賢利之者多曷云忘報若能推樂施之士以  
期欲仁之疇演忘報之意引向義之心則義  
寔在斯求仁不遠

釋曰情仁義者寡利仁義者衆聞之莊書非  
直孤說未獲詳校遽見譴責夫在情既少利  
之者多不能遺賢曷云忘報實吾前後勤勤  
以爲不得配擬二儀者耳復非篤論所應據  
正若樂施忘報即爲體仁忘報而施便爲合  
義可去欲字并除向名在斯不遠誰不是慕  
答曰濟有生之類云云斯旨宏誕非本論所

及無乃秦師將遁行人言肆乎

釋曰足下論挾姬釋吾亦答兼戒周足下以  
此抑彼謂福極高門吾伸彼釋此云慶周兆  
之物足下據此所見謂祚止公侯吾信彼所  
聞云尊冠百神本議是爭曷云不及夫論難  
之本以易奪爲體失之已外輒云宏誕求理  
之塗幾乎塞矣師遁言肆或不在此

答曰豈其相迫居吾語子聖人在上不與百

神爭長有始有卒焉得無死之地云云

釋曰豈其相迫一何務德居吾語子又何壯

辭凡爲物之長豈爭之所得非唯不爭必將  
下之不可見尊冠百神便謂與百神爭長無  
乃取之勝薛棄之體仁和謂物有始卒無不  
死之地求之域內實如來趣前釋所謂勝類  
諸區有誠亦宜然者也至如山經所圖仙傳

所記事關世載已不可原況復道絕恒情理  
隔常照必以於我不然皆當絕棄此又所不  
得安

答曰夫辨章幽明研精庶物云云

釋曰逮省此章盛陳列代文博體同頗善師

十一

十九

法歌誦聖世足爲繁聲討求道義未是要說  
耳昔在幼壯微涉羣紀皇王之軌賢智之迹  
側聞其略敢辱其詳惠示之篤實勤執事

答曰何必陋積慶之延祚希無驗於來生蹲  
膜揖讓終不並足竊願吾子捨兼而遵一云

云

釋曰不陋積慶已伸信順之條貫希來生之  
亦具感報之說藻袞大裘同用一禮蹲膜揖  
讓何爲不俱行一世理有可兼無謂宜捨  
答曰蜀梁二叔世人驛胥之譬非本論所經

故不復具云

釋曰近此數條聊發戲端亦猶越人問布見  
採於前談肆業及之無相多怪然二叔爲問  
欲以却編戶之疑沒而不答誠有望焉足下  
連國雲從宏論風行吾幽生孤說每獲竊議  
此之不侔事有固然實由通才所共者理歟  
忘其煩貪復息心

### 弘明集卷第四

#### 音釋

牘	鋤陌切	麌	靡爲切	斃	子斃	毗祭切	荄	古來
	幽深也		初生曰麌					
鑒	武移切	鱠	魚鱠切	嬖	嬖	剗剗切	剗	剗苦
	根鑑也		生曰鱠					
剗	胡剗切	淪	以灼切	肉湯	鹵	郎古切	鷄	也屬
	割也		切內					
𦥧	余亮切	遯	徒因切	湯	鹵	郎古切	鷄	也屬
	飛物也		隱也					
𦥧	辛聿切	輶	夷質切	許堯	脚	許良切	脚	也屬
	快也		突也					
𦥧	名	跔	石切	脚	脚	羊羨也	羨	也屬
	跔也		跔也					